



**Broj: 03-03-05-32514/16**  
**Sarajevo, 14.11.2016. godine**

**SKUPŠTINA KANTONA SARAJEVO**  
**N/r predsjedateljice, prof. Ane Babić**

**PREDMET: Odgovor na zastupničku inicijativu zastupnika Fahrudina Pecikoze, koja se odnosi na isplatu novčanih sredstava sa računa Fondacije za istinu pravdu i dostojanstvo, dostavlja se -**

Na 21. Radnoj sjednici Skupštine Kantona Sarajevo, održanoj 26.10.2016. godine, u okviru tačke dnevnog reda "Zastupnička pitanja, inicijative i odgovori", zastupnik u Skupštini Kantona Sarajevo Fahrudin Pecikoza, pokrenuo je zastupničku inicijativu vezano za isplatu novčanih sredstava sa računa Fondacije za istinu pravdu i dostojanstvo, koja glasi:

"Zastupnička inicijativa za Ministarstvo pravde KS

S obzirom da raspolazem informacijom da je sa računa Fondacije Istina, pravda, dostojanstvo (na čiji račun je prebačeno preko 400.000 KM sa računa Ministarstva za boračka pitanja KS tokom 2010-2012) uplaćeno 130.000KM na račun advokatske kancelarije Esad Hrvaić za potrebe "Tužba za pravedan povratak u RS", pokrećem inicijativu da Vaše ministarstvo preispita ovo korištenje novca jer je ono nenamjensko.

Naime, prema odluci Skupštine KS, novac koji se uplatio gore navedenoj Fondaciji, bio je isključivo namijenjen za odbranu optuženih/osumnjičenih pripadnika Armije RBiH. S obzirom da je sa te budžetske stavke, 130.000KM dato za "tužbu za pravedan povratak u RS" očito je da se radi o nenamjenskom trošenju novca, te od Vas tražim da s tim u vezi pokrenete odgovarajuću pravnu proceduru prema Tužilaštvu Kantona Sarajevo i policiji KS.

U prilogu ovog pitanja, dostavljam Vam i dokumentaciju koja potvrđuje moje navode."

Razmatrajući zastupničku inicijativu zastupnika Fahrudina Pecikoze, a nakon izvršenih provjera, iz okvira nadležnosti Ministarstva pravde i uprave Kantona Sarajevo dajemo:

#### **ODGOVOR:**

Analizirajući navode inicijative, može se zaključiti da je sa Fondacije za istinu pravdu i dostojanstvo (na čiji račun je prebačeno preko 400.000 KM sa računa Ministarstva za boračka pitanja Kantona Sarajevo tokom 2010-2012) uplaćeno 130.000KM na račun advokatske kancelarije Esad Hrvaić za potrebe "Tužba za pravedan povratak u RS".

Također, prema odluci Skupštine KS, novac koji se uplatio gore navedenoj Fondaciji, bio je isključivo namijenjen za odbranu optuženih/osumnjičenih pripadnika Armije RBiH, te da se radi o nenamjenskom trošenju novca.

Kako se u konkretnom slučaju radi o budžetskim sredstvima koja su sa računa Ministarstva za boračka pitanja Kantona Sarajevo uplaćena na račun Fondacije za istinu pravdu i dostojanstvo, koje je u skladu sa odredbama člana 11. Uredbe o kriterijima za finansiranje programa i projekata neprofitnih organizacija i udruženja koji se finansiraju/sufinansiraju iz budžeta Kantona Sarajevo ("Službene novine Kantona Sarajevo", br. 33/11, 3/12, 37/13 i 16/14), bilo dužno da prati i

kontroliše utrošak navedenih budžetskih sredstava, te imajući u vidu djelokrug poslova Ministarstva finansija Kantona Sarajevo propisan odredbama člana 13. Zakona o organizaciji i djelokrugu organa uprave i upravnih organizacija Kantona Sarajevo („Službene novine Kantona Sarajevo“, broj 2/12 – Prečišćeni tekst br. 41/12 i 8/15), da vrši upravne i stručne poslove utvrđene ustavom, zakonom i drugim propisima, koji se odnose na ostvarivanje nadležnosti Kantona Sarajevo u oblasti finansija i budžetske inspekcije, obavještavamo Vas da Ministarstvo pravde i uprave nije nadležno da postupi po istoj, te inicijativu sa priložima dostavlja Ministarstvu finansija Kantona Sarajevo i Ministarstvu za boračka pitanja Kantona Sarajevo na nadležno postupanje.

S poštovanjem,

**MINISTAR**

**Mario Nenadić**

Dostaviti:

1. Službi za skupštinske poslove Kantona Sarajevo,
2. Stručnoj službi Vlade Kantona Sarajevo,
3. Ministarstvu finansija Kantona Sarajevo,
4. Ministarstvu za boračka pitanja Kantona Sarajevo
5. a/a.

